

石門文字禪

石門文字禪卷第九

宋江西筠溪石門寺沙門釋德洪覺範著

門人覺慈編錄 西眉東巖旌善堂校

排律

次韻曾侯見寄

客食石門寺而今僅兩年衰遲嗟我老邂逅識君賢
聖域人稱亞儒林秀譽先未揎攀桂手已許買山錢
壟麥秋期近庭槐晝影圓方思歸去日忽得寄來篇
意合蒙推獎情親出愛憐格幽凌雪勁詞錦照人鮮
把玩欣無厭行吟却悵然句追工部袂氣拍翰林肩

世已驚殊異名宜改半千永懷風露重遶徧舊池蓮
王舍人路分生辰

貴出賢王喬宗連母后因秋容漱毛骨春色照簪紳
報國忠誠著驚人句法新慣看青禁月屢夢玉關塵
博古知無敵窮經亦絕倫後宵通七夕今日是生辰
佳氣凌湘浦非煙壓楚闌綠醺浮白螳綺席繞花輪
壽綴諸天獻詞容野客陳不凋蟾窟桂難老海山春
已作瞻雙闕行看據要津功名先入手圖畫在麒麟
閻資欽提舉生辰

節序春將半風光過上旬人間識英物地上見麒麟

凍雨晴還暗非煙夜達晨
懽聲動湘楚和氣滿簪紳
孝友疑無比恢疎亦絕倫
一身渾是德終日不違仁
夢已游青禁行當侍紫宸
立朝知大體博古見全醇
詩妙終聯鼎文高類過秦
公廉清似玉剛正凜如神
幙下名流集堂中綺宴陳
貫珠歌白雪浮蟻皺紅鱗
自幸承顏舊仍容造膝頻
何時渡弱水同看十洲春

陳奉議生辰

華國生賢俊江山孕秀靈
鴨頭淦水綠螺髻玉筒青
敏捷收科第竒豪見典刑
咲談回暖律詩句挾風霆
官偶求彭澤才宜在漢庭
麒麟橫逆氣鸞鷟斂修翎

民訟多閒日棠陰自滿亭浪傳書課奏須看鼎彛銘
仲夏逢佳節非煙聚杳冥數冀餘一葉推道間千齡
阡陌登豐後笙歌爛熳聽綺筵環妙麗壽竿捧娉婷
歡洽連更燭情高促畫屏九衢花照夜萬井月開局
風颭銀河動天驚玉露零三台星密處旁有老人星
次韻曾伯容哭夏均父

青松傲霜雪事悞亦迤邐或脫斧斤厄則遭藤蔓纏
北渠材礪礪聳壑色芳鮮不作千楹棟終爲萬斛船
那知過華屋長慟搖空鞭增擊疑仙去超搖棄我先
但餘殷枕淚無復對牀眠憶昨游滢浦曾同上紫烟

春光隨杖履咲響落雲泉尚想登臨處仍哦唱和篇
暗驚生死隔默數十三年臺憲登群彥秋風吹一鷗
誅姦志未舍謀國疏空傳醉馭毛車度誰推日轂旋
歲時嗟易得力命古難全報施徒云爾功名信偶然
清忠光竹帛英氣歛山川哭子如臨敵當勾失短鋌
五言律詩

湘上閒居

夜清暑雨過四壁草蟲鳴一枕幽人夢半窓閒月明
摧頽弘法志老大住山情忽憶陳尊宿編蒲度此生
西齋晝臥

餘生已無累古寺寄閑房睡足無來客窓空又夕陽
叢蕉高出屋病葉偶飄廊起探風簷立飛蚊鬧晚涼
秋夕示超然

夜色已可掬林光翻欲流一鈎窺隙月數葉攪眠秋
清境扶歸夢殘缸替客愁搜詩時畫席忽覺此生浮
早春

山中春尚淺風物麗煙光澗草殷勤綠巖花造次香
浮根爭附絡細葉正商量好在幽蘭徑無人亦自芳
送僧還長沙

去袂不容挽子規真滑唇烟村相送處風物更撩人

麥浪空翻日花房尚鎖春遙知到湘浦蘆橘恰嘗新
次韻真覺大師瑞香花

淺色鬧花堂清寒熏夜香應持燕尾剪破此麝臍囊
有恨成春睡無人見洗粧故山煙雨裏寂寞爲誰芳
次韻誼叟悼性上人

井美泉先竭犀殘角有通斯人難再得陳迹已成空
麈尾夢應寄楞伽寫未終平生說禪口不見怒號風
除夕和津汝楫

今夕亦常夕人偏故國思不堪槎凍耳聽誦未歸詩
家室誼譁後深簷雨雪時爐香待清旦此意有誰知

啓明軒次朗上人韻

澄滓動精色開軒萬象分光無回避處眼自覆藏君
霞縷縈經軸煙絲減篆文個中無賸語題目是先聞
回光軒

暮色眩紅碧登臨聊倚欄日終猶返照坐穩可深觀
夢幻諸緣寂圓明一顆寒洞然無向背莫作轉頭看
次韻黃元明

靜室依清几開書映隙光悟迷初不隔語默故難藏
妙可忘情會深無以意量臨機辨神駿正要略玄黃
寓鍾山

生涯如倦鳥棲息此山中睡足誰呼覺烟消篆已空
翻經欺眼力斜日借窓紅臥聽銅瓶泣青松萬壑風
讀中觀論

平生智眼濁塵劫著心深長向環輪上空將始末尋
十方真寂滅一念去來今妙調琴指知誰解賞音
對雪嘗水餅

雪粲羅敷喜報春呈舞腰旋風寒正密到地暖還消
輕薄凌梅藥蹠躑攪柳條幽欣賞水餅舉箸一長謠
清明前一日聞杜宇示清道芬

籬外花如海閒軒小寢驚最先聞杜宇更覺近清明

雲怒必爲雨風和拘得晴阿芬甘劣我笑裏恰詩成

閒門

杯飯終永日一裘支千秋餘生已無累此外復何求
懶出門常閉欣眠榻可休拋書方手倦啼鳥破深幽

四月十一日書壁

夜久茅齋靜塔泉遶珮鳴行高人莫識道遠自深明
掃榻酬閑味依蒲任性情叢林終不負一衲傲平生

次韻雲庵老人題妙用軒

開軒閒隱几萬象競趨陪風揭松聲去雲推山色來
觀身真作夢視世一浮埃日暮庭陰轉幽禽接翅回

讀瑜伽論

此生已無累一席可窮年細嚼寶公飯飽參彌勒禪
懶修精進定愛作吉祥眠夜久山空寂唯聞遶砌泉
鍾山有花如比丘狀出穠葉間王文公名爲羅

漢花僧請賦詩

通力元無礙隨緣自應真此生花上露故現葉間身
知見幽香在伽梨翠色新一枝聊把玩未愧驚峯人
寄題行林寺照堂

聞說行林寺杳然叢秀間堂清開水鏡山好理烟鬟
有霧窓呵暗無塵屏自關人牛今不見蓑笠兩俱閑

與性之

物外不可必相看一笑休好山終入手墮甌懶回頭
知復何時見聊爲此日留定難瞞道眼得喪兩浮漚
僧求曉披晚清二軒詩二首

披衣汲南澗落葉在庭除獨立無人見幽行偏自如
嫩寒冰齒頰精色到衣裾却倚蒲輪坐橫看貝葉書
旋螺堆空青重疊不容數夕陽穿貫之濃薄自呈露
數點沒煙鴻一聲伐雲斧殷林鐘未消流螢自開戶

春日谿行

側布寶坊地白沙楊柳灣憶曾嬰死禍不自意生還

已覺無鄉夢今真是故山谿花眠霧雨春在有無間
送僧歸故廬

投名新入社臥病偶思歸渡澗脫芒屨扶藤下翠微
寒松猶帶雨瘦骨不勝衣若見翁鑽紙當施百丈機
焦山贈僧二首

白下門連寺清游入夢中骨驚誰嚙指世事謾書空
梵行美渠淨天寒晝火紅曉窻應破夢臥聽鳥呼風
對牀聽夜雨佳約是當年放曠隨緣去閑心不習禪
倚蒲趺足坐擁衲蓋頭眠今識君歸處齋餘有澗泉
題反身軒

盡力覓不得歸來題反身平生未解沒寧解救滔人
有累路岐遠無求滋味親養心唯寡欲妙物久如神
宿本覺寺

一宿路旁寺霜清夢亦寒憶曾游覽處來覓舊題看
病衲成新塔層樓隱敗垣青山猶不老千疊似翔鸞
題芝軒

軒下亦何有靈芝駢秀生山川呈美瑞草木被光榮
清甚紫檀露色深黃菊英武陵續遺事應著此軒名
次韻王安道節推過雲蓋

秀傑長沙幕高才自敏強同僚推俊逸黼坐畏剛方

慣吐珠璣句宜便宴寢香秋來能過我聽雨夜連牀
題舍容室

歛足脫雙屨開房倚瘦藤百川朝巨浸一室納千燈
至味寧分別常光絕滅增剎塵彰帝網妙觀現層層
人日雪二首

今年人日雪更在末山巖瀉行想堆塚打窓時兩三
夢回清語默寒重壓衣衫面壁孤風坐知誰繼夜參
律管未回暖春先到曉巖與君清作對得月便成三
秀色報虛幌幽欣宜衲衫相看超語默覲露不須參
次韻周運句見寄

頑鈍世推鄙而君偏切磋借神觀有漏騎氣到無何
昔共飲臨汝今同家汨羅衡門似長吉軒蓋幾時過
重會雲叟禪師

氣味似前輩見之長眼明閑須研法味老不減詩情
草聖因蛇鬪禪枝解虎爭一堂聊寄傲疎快餞餘生
次忠子韻二首

湘雲刺世眼獨可著閑蹤鷗迥千尋雨江寒一再風
旋鑽新火後初脫夾衣重坐客經年別蘭芽茁舊叢
新秧翻翠浪青子退紅英穫麥風光近絡絲歡笑聲
疊騰幽夢破醞造小詩成好在歸來燕營巢占盡楹